

思玄庸言
凝齋筆語
空同子纂約
蘿山雜言
后渠庸書
言
冥影契
汲古叢語
拘虛晤言
海石子內外篇
子
樵



后
渠
庸
書

崔銑
著

中
華
書
局

后渠庸書一卷

洹野崔銑子鍾

圖象繁而易荒矣小序廢而詩蕪且淺矣左氏輕而春秋虛矣喜新變古君子無樂乎斯焉爾

諸子賊乎文者也六朝賊乎詩者也無與忘賊乎學者也夫芻豢天下之至美也王公食蔽則以為大美女莊也列也佛也申也韓也沈也謝也宋賢闢而廢之矣今獵之而爲奇珍之以爲真眩視發聞六經又晦矣哉

士之好高也有三欲焉一曰匿二曰譽三曰便夫不事事則中之真偽混矣非匿乎迹奇取慕事常取忽

非譽乎玄則人莫測也高則人莫階也然後操從由已非便乎然久則不可掩夫子示學曰主忠信而已矣

尤而後慎言悔而後理行末之及已寒而索裘不亦晚乎亂而親賢不亦亡乎易曰繻有衣袽既繻而猶有袽恐或墮也寒其遠諸

治而必亂者人也長而必消者天也人至逸而便者莫踰於坐臥坐久思立臥久思興故易窮則變變則通且久治亂者人回天者道易曰繻有衣袽美帛曰繻敝絮曰袽繻轉為袽衰代盛矣噫可不戒乎

厭魏徵而貞觀怠矣疏宋璟而天寶兆矣夫治與亂
猶人之行與止也不止則行二者弗可兼用已故君
子戒謙終其身戒則升於治謙則推其亂易曰繻有
衣袽言勿以新繒而棄舊袽也奚亂之有

虞帝之德不可加已求而征苗苗胡逆命乎夫夷狄
猶禽鳥也人而踐禽鳥之居而弋之其不奮翼而逃
去者鮮矣夫聲人之罪是自章其德也以德相報不
幾於元乎因益班師修文德已而不見苗之有罪也
安得而不服哉

沈者陽也疑者陰也陰生物非陽運之則弗能故陽

得陰而行陰得陽而靈若曰陰陽一氣爾人死而魂魄離者何居

或曰周正改時與月乎曰改子嘗思之矣有至理存焉春夏陽也陽生於子而極於巳秋冬陰也陰生於午而極於亥夫行夏之時夫子之議禮也春王正月夫子紀事之文也禮有因革事無增損是非兼存裁之在人若曰夫子截其冬而首春則弑君變古者何以易其文也

耶律晉卿之諫弑許平仲之興學劉夢吉之不仕夷元三儒而已矣方希直之志李時勉之直薛德溫之

清王公度之不折不扣明四臣而已矣

二南正家也變風化於國也雅則天下之化焉頌以
事神學成而應見矣故曰惟仁人爲能享帝惟孝子
爲能享親仁且孝德之備也魯頌著其僭也商頌存
古也詩斯終矣

宋人之說古事也多以其意億之始猶昭然也習之
久遂若真者誣矣哉

或曰二南之名義何也曰周召地名也南樂名也取
明盛之義也一曰夏當文王時周公少且武王在焉
未必使之爲政成王幼而後周公攝政也

大賞數世斯亂矣大獄興國斯亡矣人慕賞則幸有
事獄廣逮則濫及者衆樂禍憚民不以奚待哉

問忠恕曰盡心於恕爲忠恩有殺禮有等當其分不
數以疏忠之事也故以德報怨非忠矣量已恕人非
恕矣夫子嘗語曾子矣而恐其易之故又曰吾道一
以貫之一者忠恕是也後人欲高其論而達斯義也
其未然乎

河圖洛書之文緯書載之五行相生且相克也術家
之言也夫子述伏羲之作易自仰觀以下凡六事非
特取於二圖而已其詳不得而聞也能明八卦之義

斯可矣陳氏希夷所謂索隱行恠者與不可通於易也已

程伯淳得仁之公者也程正叔得仁之正者也張子厚得仁之勇者也司馬君實得仁之質者也

得理多者存乎讀書得理速者存乎辨得理深者存乎思得理實者存乎行

至哉夫子之教也使人事事而道存焉孟子曰學問之道求其放心而已矣條目不具矣以求心故曰居處恭執事敬與人忠出門如見大賓使民如承大祭其存心之方乎夫心火屬也火麗物而後有形心宰

事而後有造異端之言異焉曰靜則心定而理自見
無待乎學矣是猶舍耒耜而言耕也不能是非學者
之所患也學之患有三曰輕曰疏曰弱輕之失殆疏
之失紵弱之失廢

問曰顏子之樂可得聞乎答曰古人以盡倫爲樂瞽
叟底豫舜之樂也兄弟既翕周公之樂也若曰風月
之懷花柳之興萬物同體天地爲侶斯後人之衍言
毋乃誕乎

問曰傳曰幽贊於神明而生蓍舊訓奚宏答曰蓍者
策也非指在地之草蓍龜皆聖人所立占事之名天

生百物聖人相宜立器以周民用是故刻木爲書鑄金成鼎截竹作律取蒿爲蓍天地一闢廢物露生則蓍已出矣至今與廢草同茂奚待聖人之贊乎

監司患兵政之廢問於崔子答曰毋以政爲慮必也擇人乎今世胄之子豢養而不學惟其豢也故專賄惟其不學也故迷稍有異者不便於僚胥相陷以訟株連百人必歷歲而誣乃白故署如傳舍篆如驛符旬更二人者有矣事誰與治是故先掄其才次定其任誨其不及而需其成宥其小失而絕其罔任專而人思奮時久而務益諳其少有濟乎

友人有倅郡者崔子告之曰君知政乎夫子曰政者正也學正斯可以言正人矣是故脩容治度齊其外也審幾守一正其中也誦經履實滿其量也辨詞考迹驗其真也歛束含畜養其有也是故明則容直則溫斷則審

崔子謂唐監司曰刑欲其審不欲深令欲其簡不欲煩未化而責民善則民怠未孚而責民從則民疑怠以刑去疑以議定則殘擾之害生焉故四馬未調不可言御六物未具不可言漁同行而僻止者化也同令而行興者孚也是故化無刑孚無令

卷止